

## I Sulat Febe Pol di dad To Ftoo di ku Dyisas di Galasya

<sup>1</sup> Do, Pol, i smulat di gamu. Ise ku to i mdek do, na là fagun dun di dademe to, bay yé mdek do Dyisas Krayst, na Dwata Mà, i mték ku Dyisas Krayst di fati. <sup>2</sup> I kdee dad to ftoo dini, magin ale di do kmumusta di gamu di dad simbahani di Galasya.

<sup>3</sup> Yé kayègu moon ku Dwata Mà na i Amuto Dyisas Krayst mlé gamu kafye na ktanak nawa.

<sup>4</sup> Na Krayst mlé i kton di fati du mdà di dad salàto du fye galwà ato mdà di lam i dad sasè nimò i dad to là ftoo di mdu ani. Na i nimò Krayst ayé, naginan knayè i Mào Dwata. <sup>5</sup> Too magdayen i Dwata kel di landè sen. Amén.

### *Lo satu i Fye Tulen*

<sup>6</sup> Tikeng agu di klalyu tmagak i Dwata, dunan i tamlo gamu fagu di kafye Krayst. Na baling gamu ftoo di mahal tdò i manla lê satu Fye Tulen. <sup>7</sup> Bay too ti glut i man-gu di gamu, landè dademe Fye Tulen. Na i dad to ayé, lola flibug i fandamyu, na kayèla falmo i Fye Tulen gablà di ku Dyisas Krayst. <sup>8</sup> Bay balù gami ku demen i satu kasaligan mdà di langit tamdò, na là salngadan di ta tdòmi di gamu, mulà moon falnayam kenen kel di landè sen. <sup>9</sup> Ta manmi ani di gamu, na ani lègu nulit. Ku nun to tamdò, na là salngadan di ta tdòmi di gamu, mulà moon falnayam kenen kel di landè sen.

<sup>10</sup> Yé man nawayu kè ku yé kayègu flehew i dad to? Ise. Yé kayègu flehew i Dwata. Ku yé kayègu flehew i dad to, là gten agu tlo fasak Krayst.

*I ktulen Pol gablà di katlo Dwata kenen*

<sup>11</sup> Dad flanekgu, kayègu fгадè di gamu, na i Fye Tulen ta tdògu di gamu, ise mdà di dad to. <sup>12</sup> Ise ku gdawatgu mdà di dad to, na landè to tamdò dun di do, bay Dyisas Krayst i fite dun di do.

<sup>13</sup> Ta lingeyu sa i adatgu di munan di klapògi i tdò dad Dyu. Toogu falnayam i dad to ftoo di Dwata, na nimògu i sen gnagan-gu falmo dale. <sup>14</sup> Di bang ayé, ta baling agu mdatah di dademegu Dyu salngad ktuami di klapògi i tdò dad Dyu, midul fa i do kimen di tdò i dad gutambulmi.

<sup>15</sup> Bay mdà di kafye Dwata, ta tanfingan agu di lamgu là sut, na tlon agu mimò i knayèan. <sup>16</sup> Na fiten di do i Ngàan du fye tdògu i Fye Tulen gablà di kenen di dad to ise Dyu. Na di bang ayé, landè to gumnigu flau. <sup>17</sup> Na là salu agu di Dyérusalém lmauy i dad to muna dek Dwata. Bay, yé nimògu gasil agu salu ditù di Arabia, na kafnge ayé, lê agu samfulê di Damaskus. <sup>18</sup> Na kafnge tlu fali, yé klogu gatù di Dyérusalém du fye dilègu Piter, na fanak agu di safédan sfalò lime butang klon. <sup>19</sup> Na landè dademe dad to dek Dyisas teen-gu, lo senan Dyém, i twali Amuto Dyisas.

<sup>20</sup> Slame glut kdee sulatgu ani. Na gadè Dwata là tmulen agu kéng.

<sup>21</sup> Kafnge ayé, fles agu ditù di Sirya na Silisya. <sup>22</sup> Na i dad to ftoo di ku Dyisas di Dyudiya, là lmenla mite do di munan. <sup>23</sup> Lo yé gadèla gablà di do i lingela tulen i dademe dad to, yé manla,

“I to falmayam gito di munan, ta tamdò i kaftoo di ku Dyisas Krayst. Yé ta tdòan ani i knangan di munan.” <sup>24</sup> Taman, toola dnayen i Dwata mdà di do.

## 2

### *Pol na i dademe dad to dek Dyisas*

<sup>1</sup> Kafnge i sfalò fat fali, yé klogu samfulê ditù di Dyérusalém magin ku Barnabas, na fagin-gu Titu. <sup>2</sup> Yé duen-gu samfulê ditù du dek Dwata agu. Lo yé gustulen-gu di dad ulu i dad to ftoo di ku Dyisas, na yé tulen-gu dale i Fye Tulen tdògu di dad to ise Dyu. Yé duen-gu fbateng dun di dad Dyu ayé, du là mayè agu ku i katdògu di munan na di mdu ani ku landè gukmamu dun. <sup>3</sup> Na balù Titu, i magin di gami, Grikkenen, bay landè fmeges dun fimò ilè di lawehan, <sup>4</sup> balù ku nun dademe dad to mayè fimò dun di kenen. Lo ale flingu ftoo, na ta magin ale di gami du tnanulla i kagalwà ta gdawatmi mdà di ksasatumi di ku Krayst. Na yé kayèla lè gami magfasak samfulê. <sup>5</sup> Bay là tifafisan gami di dale, du fye fles mnè di gamu kaglut i Fye Tulen.

<sup>6</sup> Na i dad sawe ulu ditù di simbahani di Dyérusalém, landè tanlasla di dad tdògu. Na là mabtasan di do ku simto ale du i Dwata landè nungulan. <sup>7</sup> Bay, i dad ulu ayé, gadèla na ta gable Dwata di do i glal tamdò i Fye Tulen di dad to ise Dyu, salngad i kablén ku Piter i glal tamdò i Fye Tulen di dad Dyu. <sup>8</sup> Du mdà di kaltulus i Dwata, dekan agu tamdò di dad to ise Dyu salngad di kdekan ku Piter tamdò di dad Dyu. <sup>9</sup> Ale Dyém, Piter na Dyan, dilè na dale ulu, gadèla Dwata fimò do ani. Toola gami dnawat dademela salngad

tamdò. Na yé gusasatu nawa i kdeemi, lwemi Barnabas, tamdò di dad to ise Dyu, na nè dale, tamdò ale di dad Dyu. <sup>10</sup> Na lo yé fnila di gami ku tnabengmi dad to landè knun di blengla, na too agu mayè mimò dun.

### *I kngak Pol ku Piter di Antyuk*

<sup>11</sup> Bay kanto kel Piter di Antyuk, nngakgukenen di kanfe i dad to du gsalà i nimòan. <sup>12</sup> Di lam là fa kel i dad to dek Dyém, gal kmaan Piter di saféd i dad to ise Dyu. Bay kanto ale kel, ta fawagkenen, na là kmaanan di safédla du likò di dad Dyu gal mdek i dad to ise Dyu fimò ilè di lawehla. <sup>13</sup> Na ta gambet di kenen i dademe Dyu ftoo, na balù Barnabas, ta lè kenen mgebe. <sup>14</sup> Na kantogu teen na là glalò i nimòla di kaglut i Fye Tulen, man-gu di ku Piter di kanfe i kdee dad to, “Dyu ge, bay i nimòam salngad di nimò i dad to ise Dyu. Na ku yé nimòam, dét i kibòam flalò i dad to ise Dyu di adat i dad Dyu?”

### *Galwà i dad Dyu na dad ise Dyu fagu di kaftoo ku Dyisas*

<sup>15</sup> Gami i dad Dyu mdà di ksutmi, na ise ayé gutambulmi di dad ise Dyu i galmi man, “Dad gamsalà” du lnafàla i uldin Dwata ta fagun di ku Mosis. <sup>16</sup> Na gadèmi landè to tluh di kanfe Dwata fagu di kimenan i uldin, bay lo fagu di kaftoon ku Dyisas Krayst. Taman, ta lè gami ftoo ku Krayst Dyisas du fye tluh gami fagu di kaftoomi di kenen. Na ise ku yé gumdàmi tluh mdà di kimenmi i uldin, du landè to tluh di kimenan i uldin. <sup>17</sup> Balù ku yé naluh nawami mgimò tluh di kite Dwata mdà di ksasatumi ku Krayst, bay teen dad to sana

kagsalàmi salngad di dad to ise Dyu. Yé kè kayèan man na Krayst i gal mdek gami mimò salà? Ise ayé. <sup>18</sup> Ku lègu sanfulê i ta knagolgu, dini gugmadè dun ta lnafàgu i dad uldin. <sup>19</sup> Yé mebe do di fati i uldin du mdà di là kgimen-gu dun. Na ta tnagakgu du fye gimen-gu i knayè Dwata. Fagu di kaftoogu ku Krayst, ta gagin agu di kfatin di krus. <sup>20</sup> Taman, ta ise do i mto, bay Krayst i ta mto dini di do. Na i lawilgu gnamitgu di kaftoogu di Ngà i Dwata, dunan i kambong do nawa nafafati di do. <sup>21</sup> Là ti tnagakgu i kafye Dwata, du ku yé gumdà Dwata famdam ta tluh i satu to fagu di kimenan i dad dekan, landè gukmamu i kfati Krayst di krus.

### 3

#### *I uldin na i kaftoo*

<sup>1</sup> E, dad to di Galasya, sawe book gamu. Simto i gutabanyu? Ta too mbateng sa i ktulen dun di gamu gablà di kfati Dyisas Krayst di krus. <sup>2</sup> Nun snakekgu di gamu. Dét kibòyu gamdawat i Tulus Dwata? Gdawatyu kè fagu di kimenyu i uldin Dwata fagu di ku Mosis, ku demen fagu di kaflingeyu na kaftooyu di Fye Tulen gablà ku Dyisas Krayst? <sup>3</sup> Tay kbookyu. Di katbùyu ftoo, yé snaligyu i Tulus Dwata. Kafnge ayé, ta baling yé snaligyu i gamu gnagan. <sup>4</sup> Landè kè btasan di gamu i kdee dad ta gnaguyu? Là fakay ku landè ulé i dad gnaguyu ayé. <sup>5</sup> Di kablé Dwata i Tulusan di gamu na di kimòan i dad tnikeng di blengyu, dét duenan mimò dun? Mdà kè di kimenyu i uldin, ku demen mdà di kaflingeyu na kaftooyu di Fye Tulen?

<sup>6</sup> Salngad ayé man i Tnalù Dwata gablà ku Abraham, “Fantoon i Dwata, na mdà déé, tluh kenen di kanfen.” <sup>7</sup> Na salngad ayé, i kdee dad to ftoo di ku Dyisas Krayst, dale mgimò dad bel Abraham. <sup>8</sup> Di kafusat Dwata i Tnalùan, ta sanan gadè na tanluhan i dad to ise Dyu fagu di kaftoola. Taman, ta falan fgadè i Fye Tulen di ku Abraham, manan, “Fagu di ge, banlégu kafye i kdee dad sahal to di klamang banwe.” <sup>9</sup> Ftoo Abraham di Dwata, na banlén kenen kafye. Taman, i kdee ftoo, lén ale banlé kafye.

<sup>10</sup> I kdee dad to smalig di kimenla i uldin, ta mnè di tahla i flayam Dwata, du ani man i Tnalù Dwata, “Falnayam i kdee dad to ku là sdulèla nimen i kdee dad uldin ta gsulat.” <sup>11</sup> Na tooto gadè là ti tluh i satu to di kanfe i Dwata fagu di kimenan i dad uldin Dwata ta fagun di ku Mosis, du ani man i Tnalù Dwata, “Lo yé gamfun nawa landè sen i to tluh di kanfe Dwata fagu di kaftoon.” <sup>12</sup> Bay i uldin, là tìmaganan di kaftoo, du ani man i Tnalù Dwata, “Ku nun to, sanduléan nimen i kdee uldin, gfunan i nawa landè sen.”

<sup>13</sup> Bay baling yé maflayam, Krayst du nsòan ato mdà di kaflayam gdawatto moon di là kgimento i uldin, du ani man i Tnalù Dwata, “Nè to fnatak di krus, yé falnayam.” <sup>14</sup> Ani duen Krayst mimò ayé du yé kayèan ku i kafye ta fakang Dwata di ku Abraham lè gdawat i dad ise Dyu fagu di ku Krayst Dyisas, du fye gdawatto i Tulus ta fakang Dwata di gito fagu di kaftooto.

*I dad uldin na i fakang*

**15** Dad flanekgu, ani satu guflingen-gu i man-gu ayé. Ku nun kasafnè, na ta fnge fnirma\*, landè fakay lmafà ku demen tamnù dun. **16** Nun dad fakang nimò Dwata di ku Abraham na di belan. Na ise ayé man Tnalù Dwata ku “di dad belam.” I knayèan man lo satu to, dunan Krayst. **17** I Dwata, nun nimòn casafnè ku Abraham, na yé fakangan dnohòan. Silang blé Dwata i uldin kafnge fat latuh tlu falò fali. I uldin, là ti falmon i kasafnè ku demen landè gukmamu i fakang. **18** Du ku yé duen Dwata mlé kafye di dad to du mdà di kimen i dad uldin, ta landè gukmamu i fakangan. Bay di kaglutan, yé duen Dwata mlé kafyen di ku Abraham du dnohòan i ta fakangan di kenen.

**19** Ku gambet ayé, dét kè gukmamu i uldin? Yé duen Dwata mlé i uldin fagu di ku Mosis du fye teen dad to i salàla. Na yé ta gusen i kaflalò Dwata di uldin kanto kel i satu to ta fakangan, dunan i bel Abraham, yé dagitan Krayst Dyisas. Na blé Dwata i uldin di ku Mosis fagun di dad kasaligan, na Mosis lê man tmugad dun di dad to. **20** Landè gukmamu i to mnè di bleng du lo satu Dwata talù ku Abraham di kablén i fakangan.

### *I gukmamu i uldin Dwata fagu di ku Mosis*

**21** Yé kayèan man ani kè i uldin Dwata fagu di ku Mosis na i fakang Dwata, là maslalò ale? Là sa, du ku nun moon uldin gamlé nawa landè sen di dad to, fakay mgimò tluh i kdee di kanfe Dwata fagu di kimenla i uldin ayé. **22** Bay yé man Tnalù Dwata, magfasak i kdee dad to di salà. Na mdà déé, lo yé

---

\* **3:15** 3:15 Mbagal sulat di kasafnè.

gamdawat i blé ta fakang Dwata dunan i dad to ta ftoo ku Dyisas Krayst.

<sup>23</sup> Di laman là kel i bang kaftoo, magfasak ato di uldin, na silang ato galwà déé kantoto gadè i dalan ftoo di ku Krayst. <sup>24</sup> Taman, i uldin tamdò gami kel di kakel Krayst, na mdà déé, tluh gami di Dwata fagu di kaftoomi di ku Krayst. <sup>25</sup> Na ani, du ta ftoo gami di ku Dyisas Krayst, ta landè ktoo uldin tamdò gami.

<sup>26</sup> Na i kdeeyu, ta mgimò gamu nan dad ngà i Dwata fagu di kaftooyu di ku Krayst Dyisas. <sup>27</sup> Na i kdeeyu ta fbunyag di ku Krayst, ta déé Krayst di gamu. <sup>28</sup> Na gito dad to ta ftoo di ku Krayst Dyisas, ta landè gusahalto, balù ku Dyu ku demen ise Dyu, balù ku fasak ku demen ise fasak, balù ku lagi ku demen libun, du i kdeeto ta masasatu di ku Krayst Dyisas. <sup>29</sup> Na du ta nfun Krayst gamu, ta glam gamu di bel Abraham, na gdawatyu i fakang Dwata.

## 4

<sup>1</sup> Kaflingga dun, ku nun ngà ta mati i màan, kenen mfun kdee dad knun i màan. Bay du ngà kenen fa, landè gusahalan di dad fasak balù ku kenen mfun i kdee. <sup>2</sup> Di laman ngà fa, là fakay ku là nimenan i dad to mifat kenen, na i dad to mifat i dad knunan kel di bang fala nalék i màan. <sup>3</sup> Na salngad ayé i kagkahto gito, du di lam là fa kel Krayst, magfasak ato di dad gulmalòto magot i banwe ani. <sup>4</sup> Bay kanto kel i bang ta fala nalék Dwata, dekan i Ngàan sut di satu libun, na glam kenen di dad Dyu mgebe i uldin, <sup>5</sup> du fye falwàan

i dad to mgikat di kimen i uldin du fye mgimò ato  
dad ngà i Dwata.

<sup>6</sup> Na yé gudmilè dun ta ngà gamu i Dwata, du ta  
dek Dwata i Tulus Ngàan mnè di nawayu, na mdà  
ayé ta fakayyu tlo i Dwata “Mà.” <sup>7</sup> Na yé duenam  
man, ta ise gamu fasak bay dad ngà i Dwata. Du  
ta ngà Dwata gamu, ku dét i blén di dademe dad  
ngàan, yé lénan blé di gamu.

### *I klidù Pol gablà di dad to di Galasya*

<sup>8</sup> Na di munan, di lamyu là fa dmlè i Dwata,  
fasak gamu i dad ise glut dwata. <sup>9</sup> Bay ani, ta  
dilèyu i Dwata, na ta lénan gamu dilè. Na kan ku  
mayè gamu samfulê di dad muna gulmalòyu landè  
gnagan na landè kamu? Mayè gamu kè ku lè gamu  
magfasak di dad tdòla? <sup>10</sup> Kan ku fantooyu i dad  
lii fagu di kafèyu i dad mabtas du, na ksut i bulen,  
na i kaktu di kat fali? <sup>11</sup> Yé klikògu, keng landè  
gukmamu i kdee ta tdògu di gamu.

<sup>12</sup> Dad flanek, fakdogu di gamu, lalòyu i adatgu  
salngad klalògu i gamu adat. Na gamu, landè  
gusasè i nimòyu di do. <sup>13</sup> Na ta gadèyu sa yé  
gumdàgu gamtdò gamu i Fye Tulen di munan du  
mdà di knun tdukgu. <sup>14</sup> Na balù ku maflayam  
gamu mifat do di knun tdukgu, là ti fantulahyu  
agu, na là ti nadoyyu agu. Bay yé kdawatyu do  
salngad ku yé lmauy gamu kasaligan i Dwata ku  
demen Krayst Dysas. <sup>15</sup> Toogu lyalo i kakdoyu di  
do di bang atù. Ku loyu fakay nwè i matayu, ta  
bléyu do. Kan ani ku ta matlas i fandamyu? <sup>16</sup> Kan  
dé ku ta knangyu agu nawa? Yé kè duenan du mdà  
di ktulen-gu gamu i kaglutan?

<sup>17</sup> I dad to tamdò kéng, too ale mayè mlad gamu, bay sasè i fandufla. Yé kayèla ku gawag gamu di do du fye dale i nsenyu. <sup>18</sup> Too ti fye i mafè syan ku fye i duenan. Fanlesyu i nimòyu ayé balù ku déé agu ku demen là. <sup>19</sup> E dad ngà toogu kanbong nawa, too agu maflayam di gamu salngad di kaflayam i libun fan sut ngàan kel di kagfunyu i ldam Krayst. <sup>20</sup> Too fye moon ku déé agu di safédyu du fye fan-ganaggu i ktalùgu di gamu du too msamuk i fandamgu.

### *Sara na Hagar, i gugaflingen i lwe kasafnè*

<sup>21</sup> Nun snalekgu di gamu dad to mayè lmalò di uldin. Ta glabatyu kè i gumtatekan? <sup>22</sup> Du yé man i Tnalù Dwata gablà ku Abraham, nun lwe ngàan lagi, i satu sut di libun fasak, na i satu sut di libun ise fasak. <sup>23</sup> I ngàan sut di fasak, sut di btal ksut. Bay i ngàan sut di libun ise fasak, yé gugdohò i fakang Dwata. <sup>24</sup> Na i lwe libun ayé, yé guflingen di lwe kasafnè. I satu, yé dagitan Hagar, na yé kagkah i dad belan lê ale magfasak, du yé gugafléd Hagar, dunan i uldin blé Dwata fagu ku Mosis di Bulul Sinay. <sup>25</sup> Na yé guflingen-gu ku Hagar dunan i Bulul Sinay di banwe Arabia, na yé gumtatekan dunan i syudad Dyérusalém du magfasak i dad to di klalòla i uldin. <sup>26</sup> Bay i satu libun, yé dagitan Sara. Ise kenen fasak, na yé banwen satu Dyérusalém ditù di langit. Na gito i dad belan du là magfasak ato di uldin ayé. <sup>27</sup> Du ani man i Tnalù Dwata, “E libun landè ngà, too ge flehew. Mkit ge di klehew balù ku là lmenam gmagu katduk fsut ngà, du i libun tnagak yaanan, mas dee kenen bel di libun nalay i yaanan.”

<sup>28</sup> Dad flanek, gito ta dad ngà Dwata du mdà di kdohòan i fakangan. Gito i dad bel Isaak, i ngà Sara, dunan i ta fakang Dwata ku Abraham. <sup>29</sup> Na di bang atù, i ngà sut di btal ksut, dunan Ismaél, falnayaman i twalin, Isaak, dunan i ngà sut fagu di gal i Tulus Dwata. Na salngad ayé kagkah i dad bella di mdu ani. <sup>30</sup> Na dét kè i flau Dwata di ku Abraham i ta gsulat di Tnalù Dwata? Ani flaun, manan, “Filiham i libun fasak na i ngàan, du i ngà i libun fasak, landè gfunan di knun i màan.” <sup>31</sup> Na yé duenam man, dad flanek, ta ise ato ngà i fasak, bay ta ngà ato i libun ise fasak.

## 5

### *I kafalwà Dyisas gito*

<sup>1</sup> Yé duen Krayst falwà gito du fye ta là dè ato magfasak di dad muna gulmalòto. Yé duenam man, too gamu fbagal, na ta nang gamu lêfafasak samfulê.

<sup>2</sup> Do, Pol, i man ani di gamu. Ku yé duenyu fimò ilè di lawehyu du mdà di klalòyu i uldin, ta landè btas Krayst di gamu. <sup>3</sup> Ani flaugu di gamu, ku nè to fimò ilè di lawehan, là fakay ku là sanduléan nimen i kdee uldin. <sup>4</sup> Ku yé man nawayu tluh gamu di kite Dwata fagu di kimenyu i uldin, landè kasgagotyu di ku Krayst, na ta gtagakyu i kafye Dwata. <sup>5</sup> Bay ani i gami fanden: Dwata i tamluh gami. Na yé galmi sanfatan du mdà di kgagan i Tulus Dwata tmabeng fagu di kaftoomi. <sup>6</sup> Du i to ta masasatu di ku Krayst Dyisas, ta là mabtas di kenen ku ta nun ilè di lawehan, ku demen landèan. Lo yé mabtas i kaftoo teen di nimòn mdà di kalbong nawan.

<sup>7</sup> Ta too fye sa i kaftooyu di munan. Simto kè i fnang gamu di klalòyu i kaglutan? <sup>8</sup> Ise ku Dwata mimò ayé, du kenen tamlo gamu fdadong di kenen. <sup>9</sup> Fgeye gamu du fye là kamfit i tdòla di gamu, salngad i bulung falnok fan, du ani gal man, “Balù ku too tukay i bulung falnok fan gbol di ta sanbool, kanfitan i kdee.” <sup>10</sup> Du mdà di ksasatuto di Amuto, toogu gadè ta fan gamu samfulê lmalò di glut dalan, na falnayam Dwata i to sambulug gamu, balù simto kenen.

<sup>11</sup> Bay dad flanek, ku sana katdògu kfimò ilè di laweh, là falnayam dad Dyu agu moon, na là ti tamduk nawala do balù ku fagin-gu tdò gablà di kfati Krayst di krus. <sup>12</sup> I dad to smamuk gamu ayé, yé kayègu nang lo yé nimòla i fimò ilè di lawehla, bay yé fye fles maklang\*.

<sup>13</sup> Na dad flanekgu, ta tlo Dwata gamu du fye galwà gamu di dad gumagfasakyu. Bay nangyu gnamit i kagalwàyu ayé di sasè kfagu na fles di kagsalà. Bay yé fye nimòyu, too gamu stabeng du mdà di kasakdo. <sup>14</sup> I kdee uldin Dwata, ta mbaling lo satu di manan, “Kanbongam nawa i dademem to salngad kalbong nawam i ktom.” <sup>15</sup> Bay ku yé ganbetyu i adat dad lmanaf labè, na sigi gamu sngal na sakét, too gamu fgeye tà gamu sdulê malmo.

### *I knayè Tulus Dwata na i knayè laweh*

<sup>16</sup> Yé duenam man, ani man-gu di gamu, tooyu blé i ktoydi Mtiu Tulus du fye ta là nimenyu i sasè knayè i lawehyu. <sup>17</sup> Du too sahal i knayè

---

\* **5:12** 5:12 Ku demen skah ale di dad to ftoo.

lawehyu na i knayè Mtiu Tulus. I knayè Mtiu Tulus, knangan i knayè laweh. Na i knayè laweh, knangan i knayè Mtiu Tulus. Taman masfati i lwe ani, na yé gamsang di kimòyu fye. <sup>18</sup> Bay ku yé malak gamu i Mtiu Tulus, ta là mgikat gamu di uldin.

<sup>19</sup> Too mlal dilè nimò i satu to ku yé malak dun i sasè knayèan. Ani nimòan: Snafédan i dademe dad to ise yaanan, na too magsik na magyà i dad nimòan. <sup>20</sup> Mangamfù kenen di dad ise glut dwata, na lmoos kenen. I dad to ayé, snang ale nawa, na sbalew ale, na safè ale nawa, na safalbut ale, na lom ale, na landè ksasatu nawala, na mungul ale to. <sup>21</sup> Na galla nibal knun i dademe, na flangal ale, na magin ale di dad sasè nimò. Na nun fa dademe dad sasè nimòla gambet ayé. Na anifafaldamgu di gamu i galgu man, i dad to mimò gambet ayé, là ti gdawat ale di Kagot Dwata†.

<sup>22</sup> Bay ani blé i Mtiu Tulus: kalbong nawa, klehew, ktanak nawa, ktahà nawa, klayù nawa, kafye balu, na kagsalig, <sup>23</sup> i kakdo, na kadnan i kto. I kdee ayé, là ti gkuntran di balù dét uldin. <sup>24</sup> Na i kdee dad to nfun Krayst Dyisas, ta fnatak di krus i labi ktola gagin i dad sasè niballa. <sup>25</sup> Na du yé gumdà i nawato di Mtiu Tulus, taman kenen i gten malak gito. <sup>26</sup> Na nang ato safdatah, nang ato sbalew, na nang ato safè nawa.

## 6

### *I kastabeng*

---

† 5:21 5:21 Là gfusuk ale di langit.

<sup>1</sup> E dad flanek, ku nun di gamu tatek di salà, gamu dad to mbagal di kaftoo mdà di alak i Mtiu Tulus, yé nimòyu fansyeyu mték kenen. Bay fgeye gamu du fye là lê gamu tatek di salà. <sup>2</sup> Na too gamu stabeng mebe dad klidùyu du ani kibòyu mimen i dad uldin Krayst gamu. <sup>3</sup> Ku nun to, yé man nawan ta too kenen fye, bay di kaglutan là fyen, ta fan-gawan i kton. <sup>4</sup> Kat satu to, toon fan-geye i dad nimòan, na ku fye nimòan, fakay kenen flehew. Na nangan sngad i nimòan di nimò i daderme dad to, <sup>5</sup> du kat satu to, kenen tmimel di Dwata gablà di kenen nimò.

<sup>6</sup> I satu to ta matdò di Tnalù Dwata, yé fye nimòan fagalmenan i to tamdò kenen.

<sup>7</sup> Nang gamu flingu du là ti gafgawyu i Dwata. Ku dét i flah satu to, yé kantun. <sup>8</sup> Ku simto mlah i dad sasè knayè lawehan, yé gaktun i kalmo. Bay ku simto mlah i knayè i Mtiu Tulus, yé kantun nawa landè sen. <sup>9</sup> Nang ato ftakas mimò fye, du ku ta kel i du ta nalék Dwata, nun gdawatto taden ku là fanak ato mimò. <sup>10</sup> Na yé duenam man, too ato fakgis mimò fye di kdee dad to, matnù fa di dademeto saflanek di kaftooto di ku Dyisas.

### *I gusen i sulat*

<sup>11</sup> Neyeyu i kalbang dalan-gu smulat. <sup>12</sup> I dad to mayè ku fímò gamu ilè di lawehyu, lo yé kayèla ku flehewla i dademela Dyu, na ku là maflayam ale mdà di kaftoola di kfati Krayst di krus. <sup>13</sup> Balù i dad Dyu ta nun ilè di lawehla, là gagana mimen i kdee dad uldin Dwata fagu di ku Mosis, bay yé duenla mayè ku nun ilè di lawehyu du fye dag i dad to ale mdà di kimenu. <sup>14</sup> Bay do, là sa daggu i

ktogu, bay lo yé daggú i Amuto Dyisas Krayst mdà di kfatin di krus. Du fagu di kfatin ayé, ta landè agot i knayè banwe di do. Na do, ta lê landè ayègu mimò knayè i banwe. <sup>15</sup> Là ti mabtasan ku nun ilè di laweh i satu lagi, ku demen landèan. Bay yé lo mabtas ku ta fnalami Dwata i adatan. <sup>16</sup> Mulà moon ku blé Dwata ktanak nawa na kakdo di kdee dad to mimen i tdògu ani, na kel di kdee dad to i Dwata.

<sup>17</sup> Na di gusenan, ani man-gu di gamu. Ta là fakay ku nun to man dun ise dek Dwata agu. Teenyu sa di lawehgu i dad laas mdà di kaflayam dad to do, du yé gugmadè dun na do i fasak Dyisas.

<sup>18</sup> Na dad flanek, mulà moon i kafye Amuto Dyisas Krayst magin di kdeeyu. Amén.

## **I Falami Kasafnè (New Testament) New Testament in Blaan, Koronadal**

copyright © 1995 Wycliffe Bible Translators, Inc.

Language: Koronadal Blaan (Blaan, Koronadal)

Translation by: Wycliffe Bible Translators, Inc.

### **Copyright Information**

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Blaan, Koronadal

**© 1995, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
14bc4c76-f8e3-589b-ae5a-218cf6de169a